

Sunday, May 24, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



SPECIAL DRIVE

Aizawl Traffic Police chuan nizan khan Aizawl khawpui hmun hrang hrangah dan bawhchhia mi 74 an man.

Dan bawhchhiatna hrang hrang avanga khawpui chhunga chetsualna thleng thin ti tlem tur leh mipui him zawk nan, nizan dar 9 hnu lam atanga tukin khawvar dawn thlengin Aizawl khawpui hmun hrang hrangah khawpui himna turin ,beihpui thlak a ni a. Dan bawhchhiatna hrang hranga inhnamhnawih man hi mi 74 an tling tih Aizawl Traffic Police Media Cell chuan an tarlang , mante hi - Bike ri ring 12; License nei loa khalh 12; Chak lutuk/hlauhawm taka khalh 3; Rui chung a khalh 4 bakah Helmet khum lo/wrongside-a tlan /triple riding avanga 43 an awm bawk.

Aizawl Traffic Police te chuan Lirthei khalhtu leh neituten dan zawm kawnga tan la thar zel turin kan mipui an chah a, Special Drive hi a tul anga kalpui zel a nih tur thu sawiin, Aizawl khawpui him nan mipui te thawh ho puiah an sawm a ni.



MZP

MZP chuan Tourism department Director atana Pi R. Lalrodingi ruat nawn leh a nih duh loh lantir na'n Tourism department hnathawkte pisa kai tur chu naktuk atangin dan an tum.

MZP general headquarters hian nimin tlai khan inhmukhawm hmanhmawh kovin Zirtawpni-a Mizoram sorkarin Tourism Director charge la tura Pi R Lalrodingi a ruatna order chhuah nawn chungchang a ngaihtuah a. Thuchhuah siamin hemi chungchanga hmalakna kal zelah hian, naktuk Thawhtanni hian Mizoram Tourism Pisa kai tur dan a rel a ni. Sorkar thuchhuah hi Mizoram mipuite leh zirlaite zah lohnaah an ngai tih sawiin, he thuchhuah hi sut a nih hma chuan na takin a dodal zel

dawn tih an tarlang a, he thilahn hian MZP chuan, mipuite thlawpna a ngen a. Pisa kai tur dannaah hian, thalai hna zawng mek leh zirilaite tawiawmna an ngen tih an sawi bawk a ni.



OIL

Lawngtlai District Magistrate Pu Donny Lalruatsanga chuan an district atanga Myanmar lama petrol leh diesel hralh chhuah a khap.

Zirtawpni khan thupek chhuahin Pu Donny Lalruatsanga chuan tuialhthei (Petrol leh Diesel) te hi thenawm ram Myanmar leh ram dangah sumdawna kaihnawih thilahn hralh leh pek chhawn khap tlat a ni a. Hei hian a bik taka permit pek a huam lovang, a ti. Lawngtlai District chhunga Filling Station-te'n, Sorkar in man (rate) a bithliah aia sang (Black Marketing) in Petrol leh Diesel an hralh tur a ni lova. Filling Station-te'n mipui nawlpui, license kher ngai lo tan nikhatah petrol litre 30 leh Diesel litre 1000 (a burin) an pe chhuak tur a ni a, Lawngtlai District chhungah dan lova tuialhthei lei leh phur khap tlat a ni bawk.

He thupek hi BNSS, 2023 section 163 tlawhchhana siam a ni a, thupek bawhchhiate chu BNS, 2023 section 223 hmanga hrem theih an ni ang. He thupek hi thu leh awm hma chu thla 2 chhung kenkawh a ni ang.



FMD

Siaha District Magistrate Pu VL Hruaizela Khiangte chuan India leh Myanmar ramri kaltlanga Mizoram chhunga ran natna Foot & Mouth Disease (FMD) rawn lut thei laka Siaha district mipuite an him tlan na'n thupek a chhuah.

A thupekah chuan Mizoram sorkar A.H & Vety. Department thuchhuah danin ran ka leh ke natna Foot & Mouth Disease (FMD) Sat - I Serotype natna hri hi India leh Myanmar ramri kaltlangin Mizoram chhungah engtik lai pawh a rawn leng thut thei a nih thu a tarlang a. Hei hi thil awmdan a nih avangin Veterinary Officer leh Field Staff te chu he hrileng lakah hian inralring reng tur leh hrileng lakah Siaha district a him theih na'n atul anga hma la nghal turin a hriattir ani.

Bharatiya Nagarik Suraksha Sanhita (BNSS), 2023 section 163-na tlawhchhanin hemi chungchangah hian thupek a chhuah a. Siaha District chhunga Myanmar ramri-a Check Post leh Ran rawn luh theihna point zawng zawngah ran rawn lut te chu an him em tih Veterinary Doctor/Field Staff ten an endik thin tur a ni a. Ramri a ran rawn luhna khaw hmasa berah khawtlang hruaitu Village Council leh tlawmngai pawlte'n heng ran rawn lut te hi khawdanga an kal hma leh hri a darh zel loh na'n an khuaah lo hrengin an dah hrang (Quarantine) phawt tur a ni bawk a. FMD natna kai thei ran: Bawng, Sial, Lawi, Vawk, Kel leh Beram, Myanmar atanga rawn lutte chu Vety Doctor/Field Staff te'n a endik vek tur a ni a, a hrisel tha chu Soundness Certificate pek tur a ni.

FMD hri kai/vei niawma hriatte chu a rang thei ang berin A.H & Vety Department, Siaha-a thuneitute hnenah hriattir vat tur a ni a. Bawng, Lawi leh Sial neitu te'n a rang thei ang berin he hri laka an him theih nan FMD hri venna an pe ngei ngei tur

a ni a, hemi thupek bawhchhetute chu Bharatiya Nyaya Sanhita (BNS), 223 section 223 hmanga na taka hrem an ni ang.



WB REPOLL VOTE COUNT

West Bengal-a assembly inthlan vote thlak that neihna, Falta assembly biala vote tla chhiar mek a ni a, BJP candidate Debangshu Panda chuan fal takin hma a hruai mek a ni.

Vote hi Diamond Harbour Women's University-ah chhiar a ni a, chanchin ziah lai hian Debangshu Panda hian amah hnaih bertu, Communist Party of India (Marxist) candidate, Shambhu Nath Kurmi-a lakah vote 44,891-in hma hruai mek a, Indian National Congress candidate Abdur Razzak Mollah chu 3-na ni mekin All India Trinamool Congress candidate, Jahangir Khan-a chu 4-na a ni mek a ni.

